



Do is da Eingang an da Blumenstrass direkt am Markt

Da Hamma, des Noglstudio!

Da neie Lon am Viktualienmarkt: Ois Kundn san bloß Mannaleit erlaubt



Des sitzt! Unsa Reporta, da Heichele Uli, mit da Kosmetikarin, da Trampler Maria

Buidl: da Jantz Sigl

Echde Männa fahrn Bulldog. Baun Heisa. Schnein Baam um. Und echde Männa gengan zur Maniküre. Wennses ned glaam (oiso des mit da Maniküre), na kannnds in nächsda Zeid amoi am Viktualienmarkt vorbeischaung. Do, an da Blumenstrass 3, hod nämlich a neia Lon aufgmacht: a Noglstudio bloß fia Männa!

D Pechstein Ulrike – sie is mitanand mit ihram Mo, am Philipp, d Chefin – sogt: „Es gibt für Männer oft eine Hemmschwelle, sich dort maniküren zu lassen, wo auch Frauen Kundinnen sind. Es ist eine gewisse Scham.“ Und genau do sehns de Marktlücke fia ihra neis Geschäft. Es hoabt *Hammer & Nagel* und hod seid a boor Wocha auf.

Mia ham uns denkt: Des brobia ma aus. Oana vo unsre Reporta, da Heichele Uli, hod si d Finganägl macha lassn. Erschdda Eindruck: Da Lon schauat aus wiara Werkstod. Naggade Ziagl an de Wänd, a Werkbank in da Middn, oide Schdeggdossn – und newa da Kasse stäht a Schleifschdoa ...

As Hisetzn is aba gmiatlich, do gibts schwarze Ledasessl. Wer mog, ko Männa-Lektüre ham (*11 Freunde* etc.). Brauchma aba äh ned – weil d Trampler Maria, d Kosmetikarin, sofort mit da Arwad ofangt. Sie sogt: „Männer sind oft einfachere Kunden als Frauen. Sie reden nicht so viel, wollen im Laden nicht ihre Probleme besprechen.“

Stattdessn: Auf gähnt mit da Behandlung, und im Hinddgrund laaft a leise Musik, so zwischn Pop und Jazz. Guad: FiarasoaMännag-Schicht daad uns do aa wos andas eifoin (wia waarsn mit Rock, gern aa lauda?), macht awa nix. D Maria is genauso nett wia guad. Und da Uli, as erschde Moi bei da Maniküre, fuid si woi. A guade hoive Stund dauads (schauat im Kastl rechts) – und as Ergebnis is perfekt.



D Pechstein Ulrike is de Chefin vo dem neia Lon


Friara war in dem Lon übrigns a Möwegschäft. Da Vamieda hod rund 200 Bewerber fia de Fläche ghabt, aa fia Restaurants oda Weinhandlunga. Er hod si fias Männa-Noglstudio entschiedn – und des werd jetz konsequent durchzong. Mia frong nomoi noch: Wenn jetzad a Frau einikammad, ausnahmsweis, ois Kundin? Wos moanas, Frau Chefin? „Keine Chance!“



Und ferddig: Da Uli zoagt seine frisch gmachdnn Nägl auf da Werkbank

Bei *Hammer & Nagel* (Di bis Fr 10 bis 20 Uhr, Sa 10 bis 18 Uhr) gibts vaschiedne Manikür-Angebote vo 18 bis 48 Euro. Mia ham de klassische Maniküre fia 33 Euro brobiad. Aso gähnt:

- 1 D Händ wern mit am Desinfektionsmittl eigriem.
- 2 D Maria schneid de Nägel – ned mit ara Schaar, sondan mit a Zanga. Des is aba gor koa grobe Sach, gähnt ganz gschmeidig.
- 3 D Nägl wern schee rund gfeilt.
- 4 Jetzad schiebt d Maria d Noglhaud zruck. Sie nimmt dazua a Werkzeug her, des a bissl wia vom Zahnarzt ausschaugt.
- 5 Danoch wern de Nägl boliad (mia entscheidn uns fia glänzd, aba matt waar aa ganga). Mit am Pinsl (wiara Rasierpinsl) streicht d Maria an Staub wegga. Nachd kimmt no a Dreppal Noglöl drauf, fiad Pflege. Des braucht a bissl a Zeid zum Eiziang. Mia dangan grad ans Boliawachs nochn Auddowaschn.
- 6 Am Schluss gibts no a Massage fiad Finga mit ara Handcreme. Ferdig!



Des war los in dera Woch

WERDS A BUA?

Da Messi werd wieda Babba



Da Messi Lionel (27, da Fuaßboi-Kini vo Barcelona), und sei Freindin, d Roccuzzo Antonella (26), wern heia zum zwoaddn Moi Äiddan. Des hod da Lio säiwa im Internet varon. Er sogt in Richtung Baby: „Wir können es kaum erwarten, dich in unserer Welt zu begrüßen.“ In argentinische Zeidunga hoabts, es soi a Bua wern. Da Lionel und d Antonella ham schon an Sohn: an Thiago (2). Buidl: de vo dpa

UMGSCHNAGGLD

D Britney duad se wäh

Uuuups ... D Spears Britney (33), de amerikanische Sängarin, is bei am Auftritt in Las Vegas (USA) gstoibbad und hod si dabei am Gneche valetzt. De nächsdn zwoa Shows hods deshoib obsgot.

ANZEIGE



DÄNISCHA BSUACH

Da Kronprinz kimmt

Da dänische Kronprinz Frederik (46) und sei Frau, d Mary (43), woin noch Deutschland kemma. Vom 19. bis 21. Mai soi da Bsuauch dauan – aufm Programm stengan Hamburg und München. Es gähnt vor allem um de „Vertiefung der Handelsbeziehungen“, wia de Leit vo da Botschaft okündigt ham. Oiso: ums Geschäft.

CHILE

Da Vulkan gibt koa Ruah



Im Südn vo Chile is da Vulkan Calbuco innahoib vo a boor Dog glei drei Moi ausbrocha. Er hot a vier Kilomedda hohe Woiggan aus Aschn und Rauch aufgeblosn. D Regierung hod 6500 Leid in Sichaheid bringa lassn. Zletzt hod da Vulkan 40 Joah lang a Ruah gem. Buidl: de vo dpa

MODE-CHEFIN WERD 60

D Donatella hod Geburtsdog

D Versace Donatella, d Chefin vom bekanntn italienischn Modehaus, werd an dem Samsdog 60 Joah oid. Ma ko ihra arg glatts Gesicht meng oda ned – graddulian ko ma auf olle Fälle. Oiss Guade!

WEGAM TATORT-AUS

Granddige Thomalla-Dochda

D Thomalla Sophia (25) is granddig, dass ihra Mama Simone (50) beim Tatort naugschmissn ham. Es gebad do an „Jugendwahn“. Und es waarad gescheida, bessare Biacha zu schreim.